

松

心

詩

錄

松心詩錄卷八

番禺 張維屏 子樹

鼎湖飛泉亭觀瀑歌

匡廬瀑布天下奇，去年覽勝心神怡。今晨特訪鼎湖勝，快意欲  
慰平生思。打頭猛雨阻不得，拚此衣袂霑淋漓。雨師肯退三舍，  
避似識遊志堅不移。半山小歇已悅目，奔濤激瀨翻琉璃。左盤  
右折十四轉，層青疊翠如階梯。我來爲瀑不爲寺，到寺雖飯猶  
朝飢。亟尋飛瀑舍寺去，一亭屹立山四圍。登亭仰面忽叫絕，虛  
空粉碎誰所爲。泉自山頂來，逶迤瀑直擊石石欲支。石力敵瀑  
瀑則馳縱橫，跌宕紛離披。他瀑粗豪此細膩，倅色揣稱難爲辭。  
雪花六出向風舞，珠塵萬斛當空揮。近觀勢作雨點點，遙瞻態

若煙霏霏匡廬瀑似河漢落鼎湖瀑類星斗飛大哉造物巧善  
變長短巨細無不宜我聞有湖在山頂湖水不竭龍宅斯龍今  
龍兮本神物禱雨輒應來祁祁但願居民年豐遊客樂此湖曰  
鼎曰頂一任疑傳疑

七星巖

紆回造星巖突兀驚鬼斧崖地疑穿石巨天可補降精應北  
斗佐鎮宅南土深黑臨淵泉空青闢牖戶明明現纓珞鑿鑿指  
鐘鼓古臺立璇璣妙藥采鍾乳離離垂雲根裊裊出煙縷洞陰  
潛蛟蚪穴潤蓄風雨奇觀自化工大氣誰力舉秉炬窮其幽采  
入勇可賈

石角謠

嶢嶢确确石有角石角向人如欲攫舟人撐篙鶴俯啄併力往前防退卻對此愀然客不樂我意欲借巨靈手豎亥腳力士椎五丁鑿逢石鑿使平去石如去惡吁嗟乎我懷此意空長歎除惡務盡自古難君不見梧州以上灘灘石直到桂林三百灘

白陽朔至桂林舟中看山放歌

山近桂林爭作峯峯峯突起撐青空如竹抽筍鞭籊龍如花吐萼攢芙蓉我聞地脉猶肢體羣山皆自崑崙起尾閭漸下要維持萬指齊伸巨靈臂又聞五嶽視三公名山次第膺分封陽朔諸山儕附庸奮起秉笏思朝宗我疑五百阿羅漢南海西頭登彼岸忽然僵立證菩提老幼相依猶不散又疑媧皇將土搏爲人餘土堆積同灰塵偶然搏物物各肖山山虎豹犀象熊羆麟

我思虞舜耄期勤不倦泰華嵩衡巡已徧胡爲死獨在蒼梧或  
者愛山魂魄戀又思大禹刊旅躬胼胝櫟欂未厯蠻荒匪當年  
導山若到此應歎中原無此奇諸葛武侯遺八陣地上流傳半  
疑信何似天邊矛戟至今排共識漢代戈船由此進伏波將軍  
計尙疎功成北去遭讒誣不如留此日日啖蕙苴況有山水一  
一供嬉娛一峯如賓一峯主一峯纔缺一峯補兩峯聚首如私  
語一峯掉頭欲高舉一峯孤立甘離羣數峯相聯如弟兄一峯  
昂然意態尊一峯侍立如童孫千峯百峯磊磊落落丈夫氣笑  
彼巫峯十二夢中行雨還行雲李杜韓蘇老詞伯可惜山靈不  
相識不然大筆濡淋漓能使奇山倍生色李成郭熙古畫師眞  
蹟已恨人間希眼前何不師造物化工巧力非人爲山形到此

天如縱風起峯巒欲飛動我歌雖放留有餘八桂前頭好巖洞

### 堯山

堯山與舜山何爲在蠻服我謂不必疑古書夢晉讀放勳被四表重華宅四嶽而況宅南交早已命羲叔聖神所到處論心不論尾光天至海隅孰非帝教育至今瞻兩山二帝如在目區區辨蒼梧所見無乃局

魏溶辨蒼梧在海州

### 虞帝廟

穆若中天景悠然上世心至今來舜廟懷古想韶音俎豆千秋肅都俞一德欽峯巒儼環衛髣髴翠華臨

### 老君巖

昔讀五千言今來望顏色猶龍無他奇知白姑守黑

棲霞洞

一笑四山響再行雙袖雲洞邊逢石丈疑是日華君

龍隱洞

山本至靜物而有波濤形石本至頑物而有鱗甲靈千尋透天  
矯萬竅穿瓏玲根自伏水府勢欲騰天庭宋代盛遊蹟蘚壁紛  
題名當年泛舟處今乃屐齒停放翁詩境字照眼開巖局高吟  
驚人句或有潛蚪聽出洞一長嘯數峯天外青

蒞林中丞以燈窗梧竹圖屬題同次覃谿師韻

江南雲樹荆南夢

癸未屏至荊州  
云已觀察淮海

桂嶺山川庾嶺鄰笑我浪遊

如海客知公餘事作詩人敦盤當代誰爲主面目諸家各有真  
話到師門同悵望竹風梧月總淒神

成連去後少知音難得苔岑證素心一幅畫禪如水澹十年詩

境與山深公館選後還山十年優游藝圃間情在綏靖蠻疆偉畧任學術

易岐尤悔集感公爲示指南針公以所著退庵隨筆見贈中多先哲格言

題灕江送別圖送南山司馬東旋即用惠題燈窗梧竹圖

韻  
長樂梁章鉅黃鄰

桂林山水甲天下粵東粵西如比鄰空際羣靈佇奇語翩然

單舸來詩人精微酬放寄所託軒豁呈露存其真魚山不作

正灣沓後起何分形影神

千餘里外還聞音三十幾載欽遲心相思竟成萍水合乍見

翻似苔岑深北山回駕我方愧南國扶輪君自任灕江別緒

那足道兩地神交如芥針



商爵詩爲梁苒鄰撫部章鉅作

桂林中丞篤好古千里寄示商爵歌宣和圖繪二十四宣和博古圖載

商爵有銘首二十四形製考核知無訛孔子殷人學殷禮見此當必三摩

抄後儒何幸獲異寶法物詎止供吟哦其銘三字子孫父商尙

簡質辭無多薛功云子孫爲父作此論未正殊偏頗子孫居上

父居下尊卑倒置其謂何男子美稱父卽甫古父甫通川與父異義

非同科我爲索解列證據敢逞辯口如懸河余有商器父字解猗嗟此

器四千載神鬼守護勞撫訶前光足配大禹鼎後勁孰尋差勿

戈差弗公劉會孫若勿戈見舊唐書鐘鼎款識八桂堂中政方暇想見三爵顏微醺

豈惟清緣結金石定有瑞應徵祥和銘字丞丞象禾穗豐年預

兆生嘉禾

花埭

花埭接花津四時皆似春一年三百六日日賣花人近海多煙  
水離城少市塵東閣數畝地去歲江右言旋賃居花埭東閣聊且寄閒身

幽居

積雨人蹤少幽居世慮捐何來新履齒忽損舊苔錢水綠樹三  
面風香花一肩沙鷗天地闊隨意養餘年

西水歌

粵東歲歲有西水勢若百川將灌河衆流大小百四十

雲貴廣西諸水

合肇慶諸水共一百四十有奇皆至廣州境內人海溯源豈獨名牂牁上游建瓴據高屋

下溜趨壑盤深渦每逢盛夏輒瀉淥更慮猛雨增滂沱莽騰大  
或潰隄岸溢灑小亦傷田禾所喜廣州地濱海水來就下如飛

樓近聞沙田日廣闊想見淤積連陂陀滄海桑田古有語觀此  
益信言非訛預愁去水稍壅滯有似歸路遭遮羅奔流洶洶繞  
村郭駭浪隱隱藏蛟鼉尾閭欲洩洩不快竊恐水患他年多杞  
人之憂聊作歌嗚呼奈此西水何

銅鼓歌

西周鼙鼓音鋒鋒東周石鼓摹車攻何來此鼓溯炎漢非革非  
石其質銅傳聞伏波討交趾埽平側貳成膚功范銅作鼓鎮蠻  
土往往埋瘞山谿中我思文淵著偉績銅柱銅馬垂無窮鑪錘  
奚事更造此未必製自蠻鑠翁當時蠻地產金礦器物多用銅  
所鑄諸會鑄鼓競夸耀鼓成照眼光熊熊金釵銀釵互敲擊峒  
男峒女紛相從

晉書諸蠻並鑄銅鼓鼓成置酒召客蒙富女子以金銀爲大釵執以相鼓蘆笙齊吹

響喁啗椰酒迭勸香醇釀器從小大別子母擊銅鼓先擊當謂以子音引母音

鍊有先後分雌雄銅鼓先鍊者為雄是墓非蟾狀須審銅鼓有蟾

蟾者非也蝦蟆善鳴蟾不鳴似巨實回形易蒙或疑銅鼓多目字余謂當是

鑄成異字凹勝凸昔人謂銅器鑄陽文易鑄陰文難三代銅器

量出殊音商應宮雷州銅鼓面有十鈕鏡鐸錫義有取灘塘村

嶺名非空海州銅鼓灘廉州銅鼓塘欽州銅鼓流傳雖出自蠻俗

物久則貴超凡庸波羅每歲春二月鄉人遠近朝祝融祝融殿

上列二鼓穆若神聽聲隆隆南海神廟銅鼓鄉人擊以樂神金精班作鵬鵠緣

木棉豔映珊瑚紅鏗鎗闐鞀遠益震神物永寶馴蛟龍廣東新語云銅

鼓近則聲小遠乃聲大羊城節署未有此始自南陽公鄧嶠筠制府公來

三載百度舉文經武緯羣欽崇今春閱兵到西粵扁舟載鼓歸

于東桂林二鼓我曾見形質比較將毋同尊鬱彝鼎世不乏此  
鼓得所欣遭逢玉堂老仙擅詞翰鈴閣暇日傳詩筒愛民愛士  
兼愛古拂拭肯使塵霾封千年古色照几席一篇高唱鳴鐘鏞  
鯁生歸耕在田野時擊瓦缶隨邨農陽春高歌索里和自顧小  
技慚嘲蟲扣槃捫籥等揣測欲借雷鼓開癡解方今

昇平樂化宇百蠻重譯聲教通膠庠所鼓集髦俊闐闐鼙鼓歌  
熙雍條風不鳴海清宴膏雨旣霑年綏豐小儒介然有銅行願  
擊土鼓歌唐風

偶閱諸家詩集率成一律

日月雙輪速江河萬派長衆生同擾擾兩鬢忽蒼蒼青史無憑  
準金丹更渺茫但能留面目未敢薄詞章

登浴日亭用蘇文忠公韻

南溟無際接南天黃木灣前第幾灣萬古常升鼇背日一亭遙  
對虎頭山風帆隱隱迷烟影塵海勞勞換客顏矯首扶桑霄漢  
近丹輪如在翠微間

同作

番禺 金菁茅 醴香

風靜波恬二月天高亭臨水水隨灣南來百谷同歸海東望  
三神自有山欲挽狂瀾須巨手每逢旭景易歡顏貨通獅國  
樓噓蜃都在陽光普照間

西樵山

東樵壯歲早躋攀今到西樵鬢已斑老去豈宜虛白日興來惟  
欲訪名山百千萬事水無定七十二峯雲自閒夢裏還疑在廬

卓耳邊飛瀑響潺潺

白雲洞觀瀑

到耳已飄然當頭匹練懸瀑因山得勢雲與水爲緣石廊能容物巖深或遇仙忘言生遠想此洞未開前

同作

番禺陳澧蘭甫

白雲不出洞化作瀑泉飛直立雪千尺迴環山四圍盤渦漱

石齒寒翠逼人衣詩老骨真健

謂南翁

日斜渾未歸

夜宿雲厂

大石入人室暗雲侵我衣古苔燈灺冷陰洞鳥聲稀上界容高臥中宵悟靜機聽泉成兀坐得句易清微

同作

陳澧

屋以山爲壁人如鳥作巢峯巒排枕畔星斗挂林梢室小雲常滿欄迴樹欲交巖棲真得地何日共誅茅

九月十四日偕內子暨兒女諸孫泛舟花埭載酒東園越日徧遊大通寺翠林園五眼橋海山館貝水斗閣繒步仙

祠諸勝賦詩二首

回望雲山紫翠盤

望白雲山

離城數里不聞喧一舟穩載琴書酒二

老同攜兒女孫瞻眺佛堂又仙觀徘徊水榭與煙村清溪且喜

無風浪況有花香送到門

晚泊東園門外

勝遊恰好逢秋爽佳興偏宜傍水涯景近桑榆須愛日舟同眷

屬似浮家管絃催出天邊月錦繡移來市上花

花埭有花市

但願兒

曹知稼穡

舟行見秋禾已熟

不妨老子戀煙霞



早春遊花埭飲於東園卽事成詠

老至當行樂欣看淑景新  
煙霞六旬客風日萬家春  
隨遇心無滯忘機物自親  
不須愁暮色明月湧冰輪

侍大人遊花埭飲於東園謹步原韻

祥瀛

花地花如錦新年發興新  
勝遊偏愛水芳事總宜春  
載酒偕羣季裁詩獻老親  
承歡當素位何必羨朱輪

侍大人遊花埭飲於東園謹步原韻

祥鑑

江鄉風景好况復歲華新  
去作鳳城客去春在京歸逢羊石春  
園

林供涉趣花竹助娛親  
煙水無塵土扁舟勝畫輪

侍伯父大人遊花埭飲於東園謹步原韻

祥芝

地引遊蹤盛天開霽景新  
鳥聲如報暖花意似知春  
酒共辛

盤載詩應子建親六旬顏未老佳話待蒲輪

侍大人遊花塋飲於東園謹步原韻

祥晉

尋芳宜載酒歲序喜更新水活潮通海園多地占春和風生  
百卉佳日侍雙親豈獨天倫樂還扶大雅輪

寒食有感

閒來諸史自披緝坐對陳編發浩歎到眼始驚前轍覆設身方  
識古人難禁煙忽起中廚火觀水誰生大海瀾千載談兵祖孫  
武不知彼已莫登壇

湯雨生都督

臨汾

有詩見懷竝畫聽松廬圖見寄賦此奉

報

握手知無日論心賴有詩一篇如晤對千里慰相思世路驚烽

火生涯寄釣絲

近興珠海老漁

多情念茅屋遠贈老松枝

奉懷南山先生

三首錄一

武進

湯貽汾

雨生

滄海橫流日空山獨往時有心占我夢無計與君期不信家  
仍在還愁書到遲風前數南望傷亂有新詩

### 越臺四首

古有蠻夷長本爲中國人背秦聊號帝朝漢自稱臣詎意重洋  
水能生內地塵越臺烽火熄回首一酸辛

茗薺千甌水芙蓉萬管煙利都緣口腹害遂徹中邊烹瀹泉兼  
品吹噓火自煎兩般閒草木生殺竟操權

禹貢金三品鏐銀始著名由來數千載此物未通行

銀通行自明始蚨

散能消患狠貪欲取盈

銀至千萬古書罕見

儻留爲重賞或可練精兵

碧海鏡磨銅雲霞煥太空全消氛祲黑共仰日華紅北極星常  
拱南琛貨自通綢繆防後患經濟望羣公

三將軍歌

并序

三將軍者陳公聯升陳公化成葛公雲飛也道光庚子  
辛丑壬寅三公皆以禦夷寇力戰歿于陣余聞人述三  
公事作三將軍歌

三將軍一姓葛兩姓陳捐軀報國皆忠臣  
嘆夷犯粵寇氛惡將軍奉檄守沙角奮前殺敵敵稍卻公奮無如兵力弱敵人蠶  
擁向公撲短兵相接亂刀落亂刀斫公肢體分公體雖分神則  
完公子救父死陣前父子兩世忠孝全陳將軍有賢子葛將軍  
有賢母子隨父死不顧身母聞子死數點首夷犯定海公守城

手轟巨礮燒夷兵火兵入城公步戰鎗洞公胸刀劈面一目劈  
去鬪愈健面血淋漓敵驚歎夜深雨止殘月明見公一目猶怒  
瞪尸如鐵立僵不創負公尸歸有徐保陳將軍福建人自少追  
隨李忠毅長庚身經百戰忘辛勤嘆夷犯上海公守西礮臺以  
礮擊夷兵夷兵多傷摧公方血戰至日旰東礮臺兵忽奔散公  
勢既孤敵愈悍公口噴血身殉難十日得尸色不變千秋祠廟  
吳人建我聞人言爲此詩言非一人同一辭死夷事者不止此  
闕所不知詩亦史承平武備皆具文勇怯真僞臨陣分天生忠  
勇超人羣將才孰謂今無人嗚呼將才孰謂今無人君不見二  
陳一葛三將軍

臘月七日鍾景雲孝廉

逢慶

招同黃香石舍人

培芳

蓉石

北部 玉階 羅問探梅 八首錄一

梅花三十里老幹鐵縱橫幽味淡中領化工寒處生人來香雪海地似古瑤京莫訝繁英減花疎韻自清

贈馮展雲孝廉 譽驥 卽送北上

訪我話宵分高歌一贈君才華洞庭水事業泰山雲君將由湖北山東入

都骨要冰霜鍊詩應蘭茝薰可容誇老眼早識馬空羣初識君方醫齡

余集杜詩灑注之馬走千里清眼高歌望君子之句贈之

讀南山先生聽松廬詩集奉題四首 錄二

高要 馮譽驥 展雲

文獻宗風遠元音一代存五家區別派七子抗中原海氣雲霞擁江湖日月吞文章經濟在有本體斯尊

憂時多感激報 國重循良楚澤綏鳴雁黃梅吳城去青嶂

建昌出懷毛義檄歸帶鬱林裝時有羊何輩招邀過草堂

輓林月亭孝廉伯桐

文行兼脩者維桑佩此人淵源漢學古踐履宋儒真律已如冰

潔交朋比玉醇無人為推挽孤士易沈湮邑人舉君鄉賢聞部議駁

門人徐鐵孫榮馮子良詢徐海年瀛萬榭香時詰程謹侯

度皆為縣令皆有書來以詩答之

諸君皆現宰官身想見鳴琴治譜新造福定稱賢令尹知難敢  
謂過來人竟無法可防胥吏祇有心能對鬼神便祝享衢到開  
府莫忘風味本清貧

春日泛舟窯溪

十年三度泛窯溪好寫新篇續舊題一葉湖洄潮上下千松排  
列水東西佳辰引興尋邱壑往事驚心聽鼓鼙且喜時平身又  
健買春同把玉壺攜

同作

番禺

梁信芳

香浦

詩情畫境屬窯溪三度清遊不厭題

南翁三遊此地皆有詩

飽閱風波

松骨健悟空塵事佛眉低村頭雨暗迷春望河畔人來訪雪  
棲想到綠天銷夏好商量卜築傍橋西

萬松夾水銷夏最宜

蕭齋

獨坐蕭齋手一編靜中得味自欣然天生我輩書爲命身在人  
間骨欲仙諸史是非難盡信百年行止且隨緣近來蹤跡閒雲  
似半傍山邊半水邊



齋中讀書偶成斷句

黃帝至今年可考算來未滿五千年當時治世規模定事在唐

虞二代前

黃帝

陰陽二氣日周流萬變都歸兩畫收龍虎鳥魚多取象易中精

義象中求

周易

唐虞三代事多艱先聖憂勞未敢安不解後儒分道學坐談心

性有何難

尙書

國風真至多天趣不比莊嚴雅頌聲誦到其新其舊句姬公詩

最近人情

毛詩

春秋傳有左公穀軼事遺文賴網羅自古傳聞難盡信三家紀

載異辭多

春秋三傳

周官已被劉歆竄禮記應推小戴精周代尙文文太勝當時儀

禮已難行

三禮

羣賢七十總超倫好學惟聞許一人始悟聖門原廣大有人風

詠率天真

論語

人禽之異幾希耳此語能令汗滿身何敢高談賢與聖且求無

愧號爲人

孟子

始皇新政禁詩書父要阮儒子好儒賈董之前孟荀後扶蘇不

愧聖人徒

史記

高祖紀書好酒色漢時史筆尙存真本來滅項興劉事全賴張

韓三兩人

漢書

薰蕕涇渭不同科直道安能免坎軻獨恨諸賢開黨禍鴻離魚

網累人多

後漢書

經名道德實懸殊黃老由來本一途守黑守雌非盡守陰謀制

勝類陰符

老子

塵世浮榮腐鼠倫肯貪爵祿縛其身鯁鵬蝴蝶從吾好我愛莊

生灑脫人

莊子

莫因言語詔知人論篤安能定偽真香草美人辭絕豔孤忠誰

似屈靈均

離騷

英雄能放又能收藉手功成便掉頭半似神龍半仙鶴仲連少

伯與留侯

魯連

范蠡

留侯

兩番使越不辱命一語安劉能立功也喜著書也行樂陸生才

福幾人同

陸賈

貞非絕俗異冥鴻元禮仙舟衆望同不作危言不入黨千秋有

道郭林宗

郭泰

功烈回看管樂卑奇才真合帝王師三分鼎足安排定都在南

陽抱膝時

諸葛武侯

尊崇佛老尙虛無異學爭鳴舉世趨獨向此時思魯叟柴桑高

士是真儒

陶靖節

豈徒風度立朝廷良相能知亂未形若使早依金鑑錄至尊何

至雨淋鈴

文獻公

漁陽鼙鼓震霓裳太息郎當蜀道長千古詩人大勲業救唐先

救郭汾陽

李太白

天生杜老爲詩聖風雅能兼鉅細宜頗怪漁洋講三昧却從長

短定聲詩

杜子美 漁洋選唐五言古詩不選杜蓋以杜有北征諸長篇故也

廣大詩家推教主澤民遺愛至今傳天懷坦白天機樂不愧人

稱白樂天

白香山

嶺南山水見韓蘇先後南來德不孤蘇喜談禪韓闢佛生天成

佛總通儒

韓文公 蘇文忠公

遠瞻黃蓋衆呼嵩孤注澶淵建大功獨力擔當安社稷宋臣第

一寇萊公

寇萊公

宋遼南北已分途轉瞬金元筭到無十二萬年談數學大言不

信邵堯夫

邵康節

朱子勤披萬卷書躬行實踐又心虛後來講學紛紛起多把空

言當碩儒

朱子

宋後新添語錄科前明道學抑何多須知廬下江門老一世低

心服菊坡

崔菊坡 陳白沙

功德能兼不朽身良知豎義又翻新名臣不免隨風氣

明代講學風氣

每各置一義如禪家宗旨要作開堂講學人

王文成公

陶白

古三不朽誰無愧我百無能但率真私淑兩賢陶與白前身應是晉唐人

番禺門人沈世良編校  
南豐門人趙惟濂校刊

松心詩錄卷九

番禺 張維屏 子樹

雜詩

地以外皆天天外究何物若云大氣舉氣又出何穴何物能載  
氣操縱誰蓄洩海深不可測深極終有訖不能出天外仍以地  
爲窟何以眾水歸萬古長不溢元化既渺茫真宰亦恍惚問天  
天不言氣至自寒熱

千花不同瓣千樹不同葉是誰雕鏤之而有此分別百草各有  
心百藥各有性是誰付與之而有此一定大造不言造化工不  
言工陰陽互陶鎔總在二氣中

論語讀終身時時念三畏人惟無所畏遂至無所忌小人知畏



威貴以刑佐治君子首畏天大人在其次至於聖人言垂訓示萬世理本如日星功實贊天地古來大奸雄亦知畏清議三綱與五常賴以弗失墜言敬尚和平言畏乃惕厲人惟有所畏庶幾不敢肆

道經五千言心折惟一語曰道法自然此語實宗主試觀人未生胎中血爲精及其纔出腹血忽變爲乳丈夫美鬚髯婦人好眉嫵假使亦有鬚世上無美女物理之自然不可以悉數偶舉一兩端類推試觀縷

釋典千萬部心折惟兩言兩言曰因緣先聖所未宣苟無因與緣至親亦等閒果有因與緣雖疎如弟昆每有新相知宛若舊好敦更有未識面愛慕縈心魂不解何以然此中有因緣倫類

多如斯不獨夫婦然

天心最好生與以生生理陰陽兩相媾人世大歡喜奈何圖歡娛不顧耗骨髓甚者如畋漁縱恣不知止傾國與亡身大半因女子天公本好生世人乃好死何如玩名花以花當彼美香國卽柔鄉吾將老於此

文王嗜昌歠曾嗜羊棗二者之於味詎得爲至好可知嗜好殊譬各有其實人言爲官樂我乃覺苦惱辭官已十年當時未爲老旁人稱曰高自笑堪絕倒其實畏拘束亦頗厭膠擾脫身離簿書適意玩魚鳥但嗜一味閒此病亦不小

天道如風輪旋轉不少息今來新雖得昨去故已失明日豈無花不是今日香明宵豈無月不是今宵光積絲遂成布積新遂

成故當境苟失之欲補不能駐花前與月下顧影時獨語世緣  
皆過客借問誰是主惟不虛一息是以有千古

顏子三十二壽同天地長彭祖八百歲此言殊荒唐命長無可  
稱雖彭亦如殤昔者里有翁耄耄猶康強有口能飲食有體能  
冠裳當其居華屋已似歸山岡吁嗟人間世大夢同一場夢同  
中有異各各留心光心光死不滅心血於此藏大者爲道德小  
者爲文章

天文十詠

曰

萬物生機在太陽天光到處卽陽光一丸自轉成今古兩道交  
馳判赤黃似火炎威方酷烈催人暮色忽滄涼戈揮繩繫皆虛

語太息原無駐景方

月

何年結此太陰精長伴羲和晝夜行萬古一輪圓又缺九霄孤  
魄死還生虛傳桂樹原無質纔說姮娥便有情最憶曉風楊柳  
岸每勞相送到天明

星

誰從空際布珠璣萬古難消此局棋西虎東龍形各肖箕風畢  
雨好偏奇九州休咎分途應百種災祥列宿知堪笑世人癡不  
了派他牛女也情癡

風

來從蘋末又蘭叢聽去刁調望却空律轉八方殊冷暖賦傳萬

口別雌雄馬當吹送憐才意鵬背扶搖運物功莫說大王說君子奉揚仁在太和中

雲

一片飄然起碧空千層密布意何窮陰晴變態非人料富貴浮生與爾同能蔽太陽知大力屢催時雨見奇功莫憑龍勢誇靈氣拔地凌霄藉好風

霞

東塗西抹爛成堆妙手空空自剪裁臺現金銀憑日氣文舒錦繡信天才澄江散綺詩情遠孤鶩齊飛畫本開珠海晚來光萬丈赤城何必定天台

雨

天降甘霖潤八方能教歉歲變豐穰布來雲陣行應急助到風  
師勢更狂久旱滂沱如解渴太多膏澤亦爲殃芭蕉聲大荷聲  
碎併作虛窗一味涼

露

輕清非雨白非霜湛湛如珠照夜光有氣自能滋草木無聲不  
覺滿衣裳金盤承處三霄迴赤壁橫時一葦涼何處旱苗需潤  
澤奇功聞說甚天方

大方國無雨惟  
露最濃見明史

霜

天行金令轉商清肅殺須知本好生青女降來風有信藍橋搗  
去月無聲飛當夏令寃能白染徧秋林色倍明瘦到黃花偏傲  
汝有人晚節共崢嶸

雪

園壁方珪頃刻成玉田千畝不勞耕天工愛作瓊瑤戲人世欣  
看缺陷平幾輩耐寒方苦讀有人乘夜出奇兵何如瀾岸騎驢  
客詩思梅花一樣清

聽松園

有序

八首錄四

園在珠江之南花埭之東大通寺居其前杏林莊在其  
後地十餘畝中有二池喬木林立蓋百年物也二兒祥  
瀛見而愛之欲購爲余娛老之所余止之瀛固請謂園  
易得樹難得遂聽之瀛度地施工爲堂爲廊爲軒爲亭  
爲樓爲閣爲室爲廚爲橋爲舟經始於丙午夏落成於  
丁未春餘地數畝姑曠弗治留有餘不盡之意焉園以

水木勝木以松勝余性愛松昔旣以聽松名廬今復以  
聽松名園園常有松不常有松常有園內外有松且百  
歲之松不常有園常有水不常有水常有園內外有水  
且四面皆水不常有至若樓高見山池活通海帆移樹  
杪天在鏡中江村烟屋稻疇菜畦綺交繡錯四望若無  
際焉且夫陶公三徑子山小園白傅草堂庠詒輞川地  
以人著人偕地傳自惟樗櫟景逼桑榆敢希昔賢聊涉  
新趣春秋佳日朋舊盍簪以邀以遊斯陶斯詠花竹禽  
魚溪山風月造物所贈吾何私焉惠然肯來與眾共之  
道光二十七年仲春之月百花生曰珠海老漁張維屏  
記記成卽以此爲聽松園詩序



花竹尋常有所難松百千當時誰種汝此老不知年翠色映流水  
濤聲飛遠天蒼顏真健者並立有紅棉

木棉高三丈

古寺大通名遊園路必經禪心如水白客眼似松青勝蹟出烟

雨

大通烟雨半城八景之一

茂林堆錦屏卜鄰依淨域天許養衰齡

萬綠夾松澗百花圍草堂文窗分紫翠詩境對滄浪徑曲肱三折亭虛水一方臨流安枕簟有夢亦清涼

借他無滯水養我不羈身胸次少時事壁間多古人林泉原愛舊魚鳥似知新笑語來遊者何須問主賓

聲

春鳥秋蟲各有聲聲聲各自以情鳴不拘絲竹兼喉舌但有聲時便有情

周遂啓謀鼎歌

有序

道光甲辰夏五月漢陽葉東卿封翁

志說

得周遂啓謀

鼎將置之金山既作歌紀事復詳加攷證拓鼎銘寄示

屬賦詩

葉公好古得周鼎要我共賦周鼎詩鼎高二尺有四分百卅四字其銘辭是爲周宣酬庸器功臣遂氏名啓謀考古遂國舜之後實與媯姓同本支帥師有功史冊命南仲吉甫應等夷當時外患有玁狁內侵厥勢殊猖披宣王中興奮天討詩云薄伐吾則疑此鼎篆文作博伐博義訓大真王師請援鼎文證經義乃知傳註徒支離折首六百執五十殺敵致果宜若茲方今聖皇御六合好生之德如天慈島夷梗化雖就撫武備脩舉毋

忘遺寶鼎之出似有意我功不顯本鼎銘彰天威天生良將儻預

兆遂啓瑞應符昌期置之金山大得所豈獨懷寶無敢私體

尊神物鎮江海祥徵重器綏蛟螭崇鼎賈鼎相伯仲陽鼎陰鼎

疇雄雌君不見古鼎無獨必有偶從此金焦二鼎光燄萬古常

昭垂

王子壽比部有詩見懷賦此奉報

當代推才子裁詩寄老翁關河千里隔文史寸心同伯厚宗風

大長沙國計崇君廣雅言十六篇自關治道名山清望重白鶴在雲中

讀詩人徵畧奉懷南山尊丈

監利王柏心子壽

選續蕭樓後名高魯殿餘孟堅人物表涑水見聞書遠道貽

瑤草深山問散樗惠寄大著兼枉手書殷勤長者意歲晏獨華予

冉冉方垂白孜孜尚汗青藝文關顯晦河嶽聚英靈智慧堪  
扶健神明與睦齡九南光氣在長見老人星

照將軍行

觀其部演則時亂簡威歎也

周將軍生孝慈孝慈絕倫孝慈禦寇樓煩雷武邊城羽書急  
豕突龍奔寇將人將軍報國誓捐軀欲別終關先飲泣擎杯含  
淚奉高堂

七字本曲文

欲言不言心慘傷今朝勝不悲人子明日軍

前痛國傷兒難別母母曰否國步艱危主恩厚爲臣當效張睢  
陽爲母當如范滂母欲去未去兒徬徨母驅兒出火燄光子心  
莫遂焉私戀臣節甘從馬革亡萬鏃飛來豈能避箭血模糊氣  
彌厲四體難支一息存奮起猶能傷賊臂忠孝節義萃一門盜  
亦有道爲好義武臣忠勇盡若此我等安敢窺邊垣逢場作戲

原無音聲性感人大肝肺滿堂觀者皆肅然中有老人忽垂淚

廣州懷古

天開五嶺關炎荒古觀城西訪石羊逐鹿有才稱大長姁緒無  
道作降王巖前瓜瓞談仙蹟堂上風旛指佛場南漢興亡又南  
宋厓門波浪感滄桑

豫章懷古

襟帶江湖屬要津匡廬五老望嶙峋斬蛟自昔聞仙吏跨虎何  
時遇美人壁上楊懸難得士波間劍合果通神滕王高閣今非  
古今滕王閣非舊址惟有西山色尙新

杭州懷古

黃龍指日復燕雲長舌能傾汗馬勦三字竟成長將獄六宮空

整內人軍紅羊劫換猶餘恨白雁聲催不忍聞客到西湖增感  
歎岳墳纔過又干墳

金陵懷古

虎踞龍蟠古戰場波濤天堦總茫茫後庭玉樹宮中曲前代桃  
花扇底香十廟勳名空逝水六朝金粉剩斜陽白門楊柳猶青  
眼且向秦淮盡一觴

維揚懷古

迷樓隋苑失豪華尚有垂楊噪暮鴉戰勝至今傳皂角才難從  
古似瓊花興來狂客思騎鶴運去通侯愛種瓜二十四橋誰玩  
月冷螢飛過玉鉤斜

齊魯懷古

齊風表海勢泱泱秦嶽巖巖鎮魯疆萬古一人惟至聖九州三  
大在東方岱宗封禪無留刻孔壁經文有舊藏五百頭顱同殉  
義田橫島上劍光長

三晉懷古

嫺皇陵墓莽榛蕪弓劍軒轅事有無堯舜勳華留聖跡山河表  
裏固雄圖保孤節著雙奇客守義名高兩餓夫趙璧唐圭吾不  
愛愛他白墮可能沾

洛中懷古

源澗東西峙地形中州王氣入圖經周方定鼎能延世嶽果生  
才必降靈爽馬黃袍關運會銅駝青蓋幾飄零向風莫話夷門  
事壯士酬恩已暮齡

燕中懷古

涿鹿兵戈始薊邱桑乾河水接盧溝  
招賢駿馬先求骨雪恨將軍肯借頭  
但使溫風吹黍谷何妨白日澹幽州  
而今首善金湯固長見衣冠拜冤旒

吳中懷古

採藥飄然遠遯身延陵遜位似遵循  
豈知讓國終亡國翻聽讒臣殺諫臣  
兩墓並傳雙烈士五湖同泛一佳人  
胥臺娃館今何處短簿叢祠尙賽神

楚中懷古

萆路誰曾問鬻熊九疑斑竹影迷濛  
大江漢水流天險香草離騷補國風  
上將雙碑歸冥漠美人一劍送英雄  
白雲黃鶴高樓



在玉笛吹來思不窮

蜀中懷古

君臣魚水古稀聞白帝城高日易曛地勢可憐虛百戰天心其  
奈定三分東吳鐵鎖銷炎火北魏銅臺冷暮雲西蜀威靈今宛  
在陣圖猶似駐千軍

秦中懷古

西望秦關拔地開龍興虎視鬱崔嵬二陵殺北迷風雨一炬咸  
陽冷劫灰閱世銅人應有淚當時金馬不凡才曲江灞岸慈恩  
塔欲訪遺蹤半草萊

閩中懷古

榕城旗鼓兩山分九日尊罍自昔聞甌縣壺天閩縣石考亭書

室幔亭雲巖中物產衆爲業海底神通醋是文每到中秋明月  
夜一杯遙酌武夷君

與西懷古

驂鸞曾訪二華回林桂無枝有碧苔洞號韶音思舜樂渠開史  
祿話秦灰名花傾國當時豔斑竹沿江異代哀幾首遊仙傳萬  
口曹唐也筭小仙才

漢中懷古

峯高誰見碧雞鳴漢使空勞萬里行南詔畫河傳玉斧西平保  
障敵金城彩雲現處聲華煥奇石生來畫理精指點積骸唐代  
塚勸人殷鑒莫談兵

黔中懷古

滇南門戶楚邊疆  
整頓羅施關貴陽  
誰道蠻荒留象裔  
不妨豪傑謫龍場  
丹砂妙產同勾漏  
銅鼓餘威震夜郎  
諸葛青蓮曾到處  
至今巖壑有輝光

四月十五日聽松園獨酌

我來因玩月不意乃得雨  
得雨亦可喜潤澤徧農圃  
池荷葉已高石榴花漸吐  
翩然好鳥鳴似欲向我語  
其言雖不解其意蓋得所  
此鳥即友朋相對吾與汝  
此園亦傳舍豈必吾是主  
瀧兒爲離務所累園將售與人明日未來  
今日已往古今日且永  
日追暇飲此清雨止月亦明  
清景天所與

六朝松歌

千歲古松難得見  
奇物天生在吾縣  
六朝留得一高人  
聞者欣

然思覲面許子爲松作主人先期置酒邀衆賓詰朝相見瞻道

貌三拜致敬情乃申

余與蘭甫孝廉皆對松三揖

其身堅勁類鐵石其腰圓

圍四十尺其枝崛起若蛟騰其根深入如龍蟄蟄不盡者行地

中穿土而出如小峯陸離斑駁似古鼎僂僂拳曲同村翁於戲

此樹何年植試述傳聞追古昔晉代將軍其姓陳墓碑可考名

元德

距松里許有陳將軍墓

孫恩作亂軍南征桓桓武臣師則貞寄奴應

運纂東晉將軍抱節棲南溟有墓有祠兼有樹樹近祠堂當可

據孤臣骨老耐冰霜喬木年深滋雨露樹猶如此人何任樹以

人傳聞至今鄉人見慣不爲異許子偕友來相尋元暉子久圖

其貌

調鐵泉上舍畫二山茂才皆爲松繪圖

我請作歌爲寫照商量結箇拜松亭

小琴少尹與地主樂君培之度地構亭將題名石馬

松亦欣然發長嘯

九月三十日余七十初度前三日何子貞太史

紹基典試

還朝使舟將發攜延年益壽漢瓦篆過聽松園屬題爲

題四十字

此壽非常壽秦中漢瓦畱迴環看四字斑駁閱千秋星使索題

詠風人多唱酬

詩滿兩冊

攜來意良厚珍重比琳球

七十初度都中諸公惠詩百篇賦此奉酬

回思少壯屢瀕危豈意能吟七十詩三子登科承祖德

六兒丁酉三兒

已亥兒已酉

曾孫上學憶兒時疎慵作宦應知退老大耽書未覺疲

錫我百朋何以報心香惟有祝期頤

贈譚玉生孝廉

瑩

卽送北上

君才兼衆妙上與玉溪儒書史鬱奇氣山川成壯遊騁懷應萬

里摘藻有千秋

君明體文必博

此去紉金匱瑤編次第搜

君好訪古籍每見難得之

本必屬佳紫恒方伯刻之

### 三十六瓶秋菊歌

并序

十月廿四日許小琴少尹

文深

招同金醴香員外

菁茅

鄧蔭泉中翰

大林

杜洛川

游

陳蘭甫

禮

兩學博葉蘭臺

孝廉

衍蘭

集哦松齋賞菊爲作此歌

年年賞菊菊易陳花事敗見難鮮新千盆萬菊必萬竹

盆菊必以竹枝

扶植未免板滯無風神許君邀朋開菊宴今朝菊忽開生面三十

六瓶花態殊九十日秋佳色見

陶詩秋菊有佳色

菊花黃白兼紫紅方

圓大小瓶不同宋密最古千歲翁明養後出如兒童菊花愛新

瓶愛古菊花是賓瓶是主座上瓶皆有古風眼中花似來今雨

齋前盆石亦難得英石臘石太湖石居然咫尺有山林水竹蒼  
蒼蒲草碧齋前羅列盆  
景有山林意許君政有循吏風安良除莠如農功此  
會他年作佳話好將賞菊配哦松

南海門人李長榮編校  
南豐門人趙惟濂校刊

松心詩錄卷十

番禺 張維屏 子樹

珠江早春

咸豐壬子

珠兒珠女又新年江草江花泛畫船何以解憂惟有酒但能行  
樂卽爲仙兵戈礮火西鄰地粵西軍事車馬風霜北路天北上公車念彼  
辛勞我安逸一樽在手且陶然

粵古偶懷

九首錄四

老夫帝號本非真朝漢優游作漢臣堪笑劉郎終執挺勳名何

似洗夫人

南越

南漢

高涼

浮世生人去似塵全憑文字爲留神東周計至陳隋代廣郡流

傳止八人

高固楊孚

陳臨王範

革正黃恭

羅威張買



課虛求靜兩悠悠若論虛

六祖

陳沙第二流東粵古賢誰一等張

崔兩巖竝千秋

張文獻公

崔清獻公

振起南園自有人泰泉

黃文裕公

大雅力扶輪歐

慎伯

黎

瑞石梁蘭江藥亭

洪廊

皆千古我所思兮屈

翁山

與陳

澧

曾滌生少宗伯自京師賦詩見贈有天涯二老之句愧不

克當謹書二十八字奉酬

自慙小技張三影敢比大名梅聖俞難得高賢曾子固贈來二

十八明珠

來詩

湘鄉

曾國藩

諱生

龍飛初載啓詞場收括人豪潤建章今日天涯餘二老江南

梅叟嶺南張

先生與梅伯言翁皆以道光二年成進士

陳棠溪儀部以詩集八卷屬為商訂奉題二律即書卷端

此才真合在蓬瀛始信才難與命爭北上含香依畫省南歸侍

唐擁書城

君前集名含香後集名祖陵

宮商出手詞音協

兼工填詞

金石羅胸古

鑑精

古精共道戲鴻書入妙豈知詩力掣滄鯨

賈傅文章白傅詩憂來和墨寫淋漓地輿自愛王君紀

雲臺相國得王

象之輿地紀勝已進御其影宋本今在君處

古蹟偏工幼婦辭七字權衡雙不律千

年衮鉞一鑑鍾

古出古人諸詩皆工

小園易主非吾有每誦佳篇宛見之

君題小園詩余每愛誦之

遊聽松園

八首錄四

番禺

陳其鉞

棠溪

寺認林紅處園開澗綠邊地分蘭若界花近素馨田烟雨遙

連井

園近大通寺有烟雨井

樓臺別有天千章饒古木種植始何年

自課魚鳥狎來親更約梅爲伴還添杏作鄰

園後卽鄧蔭泉杏林莊

海氣忽成霞紅棉正吐花池光涵鏡檻帆影度窗紗詩伯今

詞伯漁家又笛家醉拈新樂府高唱付銅琶

君自號珠海老漁詞集名海天

唱贊

葉絲榮常有烟霞病獨深能酬平子願不負季鷹心

園爲詰嗣小蓬

吏隱名兼遂詩禪味細尋歸田多樂事難得好園林

香山何虎臣廣文

本年

言有琉球國人屬其族兄購余詩

集感賦

高麗昔年索詩去琉球今又覓余詩老夫衰病埋名姓不解何

由海外知

夏日涉川上人招同黃香石杜洛川顏紫虛梁福草陳古

樵李子黼集海幢寺就樹軒

吾曹能出世避暑到諸天難得清涼界而兼疏筍筵片雲行有

日涉公詩名雙樹種何年頻婆兩株隆冬不凋忽地聞花雨詩心妙入禪

### 金山篇

西北洋外波連天自古從未通人煙道光二十有七載得其地

者米利堅加里波那是其地地名加里波那不喇西亞名其山山名不喇西亞

厥地生人始裸體自以樹葉遮其前邇來得布大歡喜以金易

布羣爭先其山不知幾千里其金不知幾萬千彼氓蚩蚩貨棄

地有客采采金滿船寶誠可貴地不愛利果可圖人共傳聞人

粵人以萬計歸述客况殊堪憐程遙往返動經歲人眾逼狹相

摩肩

搭船人多坐卧不便

黃金雖多食物少雞子一枚銀一錢金夫貪金

不憚遠旅費每人將百圓米利堅人既獲利乃宅爾宅田爾田

我思金銀產於土地氣豈必分中邊中華土德秀靈聚發育豈

遜東西偏漢時黃金多且賤

孔氏雜說漢金價賤

若非土出來何緣梁州

麗江古有載

博物要覽金產梁州又金產麗江

已生酉壯理或然

天文訓金生於巳壯於酉

為羊為鼠精所變

格致鏡原金精為羊又白鼠所出有金

葉子柿子名相沿

格古論雲

南有葉子金席上腐談春陵有柿子金

委員開礦非善策供應騷擾難免焉生財

有道生者眾此事要俾民操權聽民自為上勿預什中取一當

無愆五金出土皆有用

金銀銅鐵錫為五金

有而不取空棄捐但令有利

又不擾聞風踴躍民稱賢因民利民自不費富民富國原相連

芻蕘之言倘可用請君視我金山篇

半歌

半醉半醒酒意半生半熟花名半暖半寒天氣半真半假人情

偶歌

偶遊何必乘車偶釣何必得魚偶吟何必限韻偶飲何必當壚

勿歌

貴老勿憑勢談富翁勿惜慳囊佳人勿生妬忌才子勿染輕狂

必歌

詩豪必有健筆酒伯必有巨觥真儒必有直友名將必有親兵

秋感

粵西軍玩寇有餉似無兵

聞粵西軍事糜餉不下一千萬

大帥奏勝仗小民悲

破城

全州道州桂陽州皆陷

空談多俊傑屢挫亦尊榮可惜曹州牧捐軀

畢此生吾友曹君燮培守全州十二日城破殉難

且喜長沙郡干城備不虞驚聞湘水寇已渡洞庭湖漢口通吳

會糧艘運

帝都豫防江路梗及早定訐謖

楊忠愍公獄中硯艾至堂大令暢得而藏之屬賦詩

椒山獄中一片石相依既久知石德公自記云相依既久乃知此石才德之優石知

公死忽裂坼公有自記鳳洲刻鵲眼閱年近三百此硯今為艾

侯得侯為銘之裝作冊搨本斑駁碧血碧相傳硯可鎮邪辟我

曾對硯三歎息前日堂出硯敬觀別有三硯在胸臆武穆文石玉帶

又謝石橋亭卜存耶亡耶不可必此硯得所侯寶惜如見忠

魂與毅魄球琳琅玕何足匹

杏林莊贈鄧蔭翁

有序

古杏林以董仙得名今杏林以鄧仙得名古杏林丹藥  
能濟人今杏林丹藥亦能濟人長眉道人既有丹藥濟  
世又有花木怡情是爲地上神仙率賦二詩奉贈

曾聞用虎守林邱

董仙事

豈有仙人厭衆求何似長眉老居士杏

林莊好任人遊

遊人多題詠主人輯爲杏莊題詠已刻至三集

濟世丹膏海外傳

丹藥行海外

杏林春色自年年神仙莫作高深看

但有仙心便是仙

花朝祝花神飲酒得句

香山

鄧大林

蔭泉

杏莊小酌慶芳辰杏子纍纍照眼新但願太平無箇事年年  
今日祀花神



默深刺史至粵訪余論文數日別去昨得詩知在海州次韻答之

風蟬不成音霧豹焉有文文之有收放亦如秋與春憂時賈長沙齊物莊漆園是皆真氣魄足動人心魂我坐守蟬蠹君行踏鼉鼉友聲念谷鳥吏事歌庭狔忽枉瑤華贈辭意何溫醇今宵南海月夢見東海雲

寄懷張南山

邵陽魏源默深

文更古於詩人更古於文直傾南海酒釀我胸中春水木明

瑟處人道張家園

君招飲于聽松園

誰知園中柳有我吟詩魂我今

東海吏魚鹽雜蛟鼉豈子青天月肯照河干狔一別已三秋猶酣公瑾醇聊持一尊酒酌子天南雲

古詩贈陳蘭甫學博卽送北上

皇天生才難賢才尤不易華實罕得兼德藝鮮能備我友太邱  
孫天與大智慧髫齡卽嗜學長老已驚異寸衷赴千古心力靡  
不至於經通十三於史綜廿四經義精訓詁史法明體制讀書  
審詳畧稽古分鉅細深衣考制度明堂辨方位三角研天文九  
州究地志班酈皆北人南水未親詣君特爲證明一一繪圖記  
君著有漢地理志水道圖說又著水經注箋解字宗說文著說文聲類辨餘事工篆隸行草  
法元章運腕兼指臂小學尤專門嘉惠到童穉君以近儒小學書皆與博著初  
學篇於六書訓詁音韻皆淺言之使初學易曉音韻洞源流煥若指掌示著切韻表切韻說至  
於爲文章克自樹一幟唐宋號八家昌黎實稱最君爲古文辭  
蒼健得韓意豈惟工散體乃又擅駢儷其骨則松筠其馨則蘭

蕙其聲則鸞鳳其力則騏驎詩歌不多作有作則妙製律奚界  
 唐宋古或追漢魏碧海掣鯨魚蘭茗珍翡翠興到偶填詞雋語  
 足心醉由胸有積書故筆有餘味漢學與宋學偏執遂歧視君  
 能會其通百慮實一致腹實而心虛小心乃大器遐思古人  
 不少行乖戾君才既淹通而行又醇摯小節或不拘大德必無  
 愧孝友至性敦當為力忘瘁亦有考據家不善作制藝君又工  
 時文名齊盧同楊榮文耀陳厚甫太史主講伯楊榮文耀桂文耀粵秀時有盧桂楊陳之日康熙乾隆間  
 宿學屢遭際往者何焯啟運戴震一薦膺顯貴後來加慎重  
 事每循定例仕出非一途士進由一第必能取科名乃獲展經  
 濟方今

聖天子前席求俊又其羽可為儀拔茅征以彙君今上燕臺時

來奮鵬翅梁棟巨室材圭璋大邦瑞嗟余卅年長遇君三舍避  
雖然已無能篤好人有技臨別當贈言走筆五百字賢人應德  
星君家有故事行矣向京華斗南望光氣

春酒

春酒醉難消春愁似暮潮舳舻沸吳楚烽火逼金焦賈誼休徒  
哭黃巢敢自驕民心應固結厚澤戴

皇朝

梁福草比部

七圖

寄示汾江唱和詩次韻二首

錄一

春在山巔又水湄等春得句不嫌遲選樓舊契推吳季

君與吳華溪孝

廉同選翁表詩傳

藝苑新交有子期

符南樵明經選君詩刻入寄心集

我輩嘯歌須縱

酒君家泉石最宜詩名人故宅騷人繼湟老精魂喜可知

君所居爲

程湟漆先生故宅

汾江春日偶成

順德 梁九圖 補草

四面繁花覆水湄柴關長掩日遲遲香招風過如相約夢逐  
春來似有期垂老弟兄同癖石忘形叔姪互裁詩此中幽趣  
誰窺得只許閒鷗幾箇知

癸丑三月三日李子黼廣文長榮招同黃香石舍人培芳

艾至堂大令暢喻少白參軍炳榮杜洛川廣文游譚玉生

孝廉榮集柳堂修楔

二千年內談修楔昔日蘭亭今柳堂癸丑又逢新歲序暮春依  
舊好風光洒龍詩虎成嘉會楚尾吳頭慨戰場列坐羣賢須暢  
敘莫因時事減壺觴

馮子良郡丞寄來詩集連日披誦即題一律奉寄

篇篇向我肺肝投君所經遊我舊遊難得詩人又循吏况官司  
馬近江州青衫應爲窮黎溼江西水患白髮空懷浩劫憂江南嶺南賊氛未靖  
出處不同同覓句可能心迹此中留

南山師有請寄示謹次元韻

番禺馮詢子良

百種纏綿一紙投重論出處感前遊烽烟不斷方窮海兩粵兵事

仕宦能歸是青州師曾任古安別駕可與詩閒轉愧未能學道覺

多憂先生杖履春長在神往鄉園唱栗畱陽讀春遊詩

得高麗使臣李君有容書賦此代簡

天涯雲樹友朋疎忽接高驪一紙書海左神交千里外來書有海左二字

嶺南人倦七旬餘我等舊夢迷莊蝶三十年前高麗李怡雲書來索詩君對

閒談認老漁

書來知花甲閒談三十二圖傳至高麗

翰墨壘簾緣不淺

書稱怡雲為族兄

所嗟長會此生虛

五月十一日大忠祠拜文信國生日同喻少白大令

炳榮

家月槎明經

雪帆

譚荔仙上舍

河

舒錦庭參軍

錕

李子黼

廣文

長榮

方外涉川禮畢賦詩

厓山柴市竝崢嶸兩地同為萬古名七日餓偏留命待

公七月不食不

死

三年仁以殺身成

公居燕京三年

昔從梓里瞻遺像

廬陵見公書像

今遇松

辰拜降生曾向青原尋往蹟松風一榻想寒聲

道光己未余至青原山見公墓

詩拓本有松風一榻兩語滿之句

六月廿一日歐陽文忠公生日李子黼

長榮

招同譚荔仙

家小槎

紹興

家小薌

建業

何一山

桂林

倪雲衢

始建

集

柳堂拜像賦詩

昌黎以後論宗匠屈指歐陽第一家當日宦途行逆水今朝祀  
事晉流霞翁之樂者山林也客亦思夫琴操耶公愛聽泉聲東坡爲作醉翁操  
人物生辰嘉會接祝公還要祝荷花後三日荷花生日

同作

南海李長榮子黼

昌黎唐後仰儒宗北宋高賢位望崇仕歷饒滁揚潁際名居  
文范富韓中大臣器識憂朋黨太守風流託醉翁今日瓣香  
同爵酒一堂師弟兩文忠是日以蘇文忠公畫像祀祀

九月廿八日賞菊庭宴寄二兒六兒并示諸孫曾孫

節過重陽菊又新家庭讌賞及良辰兩兒南北八千里二兒署黃梅縣

六兒吏科掌印四代尊卑三十人同在賓區何有別况多音  
欽命巡視西城



問卽常親遙知燕楚開緘日喜誦清詩當飲醇

菊讌兼旬悠然成詠

東籬當日興悠然敢謂吾廬菊勝前八寶樓臺詩境界

昔人謂七律爲

八寶樓臺

七襄機杼畫因緣

菊屏七疊秀子咲鄧陰泉黃二山梁獻廷袁顏卿陳孟卿鄭世常謝子輝俱爲

作菊燕圖

方圓望去成花陣黃白堆來是酒錢何以解憂聊自放真

仙難學學頑仙

華林寺觀五百羅漢渡海卷作歌

華林寺朝曦紅劉郎

南漢封翁

宴客春醅濃酒酣客起觀畫卷

同觀

者金明寺員外許小琴少尹鄧蔭泉中翰陳晉之廣文李了齋廣文主人南漢洪濤巨浪何洶洶五百

應真渡瀛海畫者許氏名從龍想其意在筆墨外千形萬狀羅

心胸短長肥瘦貌各別老少寬猛神不同或似歡喜有笑容或

若赫怒鬚眉雄或則羣聚雲鍾鍾或則獨立心忡忡或則舍利  
騰長虹或則瓔珞垂丰茸或跨鸞鶴翔虛空或踏鯨魚朝祝融  
上有華蓋高穹崇是何尊者位望隆下有龍王來匆匆衮衣執  
笏禮肅恭豈特江漢俱朝宗十洲三島環相通沐日浴月百寶  
豐寶氣滂滂光能熊海水欲立飛天風不辨南北兼西東前列  
海若後海童海虎海馬無敢啣其角鬐鬐毛毵毵水怪螭像安  
能窮此卷數丈觀未終是有佛力非人工主人勸客復一中客  
身髮髯遊龍宮一笑滿引琉璃鍾

彭大司空寄示松風閣詩集中有二十年前見贈之作賦  
此奉酬

鍼芥千秋合瓊瑤五字投仙人老彭齋飛夢到羅浮贈我笙鶴

句懷君磨鳳洲天風吹浩浩松巔互相酬

君所居曰松風閣  
徹盧亦名聽松

讀番禺張南山大令

維屏

聽松廬詩鈔服其五言律之妙

因題一首以彷彿其詩境云

長洲

彭蘊章

蘇我

仙山鶴一聲子晉下吹笙碧月破空出白雲隨地生鴻毛輕  
太華杯勺吸滄瀛采藥人間侶金丹煉不成

感懷

五首錄一

風聞河北竄萑苻警報烽煙犯直沽自有百神環  
紫極况兼三輔拱黃圖莽蜂雖毒何能螫餓虎難逃尚負嵎  
夜上高臺觀象緯將星明處出天弧

感事

八首錄一

番禺

沈世良

伯眉

金陵明月廣陵花一夜吳霜點鬢華人散蕪城烽繞郭草荒

螢苑柳搖鴉江遠天垂愁締突河朔山川慎犬牙可惜淮揚  
財賦地了無防衛愉搏沙

甲寅三月三日盧輿饒北都福晉許星臺水部應錄伍蔭

亭郎中長樾許筠庵太史應駁招同金醴香員外青茅桂

蓉臺廣文文昭沈少韓太史東雲珠江脩稷編遊花埭翠

林花市馥蔭芳村杏莊諸園卽事有作

蘭亭有序觴成例珠海無波會亦嘉脩稷風光多近水惜春情

緒最宜花不妨絲竹添詩料欲把園林當酒家好是朝來聞吉

語凱音傳布到天涯聞天津紅旗報捷

三月十三日展脩稷李研卿太史應田招同許青皋茂才

玉彬沈伯眉廣文世良倪雲衢上舍始達泛舟珠江晚飲

于漱珠橋酒樓

珠江新漲碧如油，節展重三又放舟。蓬島仙從滄海返，

研邪由天津浮

海旋

蘭亭禊及暮春脩敘無絃管，談方暢觴有詩詞韻欲流。四

載回頭一彈指，

辛亥秋余與友人飲此樓

雪鴻重踏漱珠樓。

漁翁

煙波閒處一漁翁，得酒偏能助睡功。睡起雨晴風又定，夕陽依舊滿江紅。

番禺門人沈世良編校

南豐門人趙惟濂校刊